

嘉慶寧國府志

寧國府志卷五

職官表

名宦附

〔漢〕張竦字伯松茂陵人博學通達以廉儉自守仕至丹陽太守封淑德侯祠祀

按陳遵傳竦免官以列侯歸長安居貧無賓客好事者從之質疑問事論道經書而已遵常謂足下苦身自約而我放意自恣官爵功名不戒於子而差獨樂顧不優耶竦曰人各有性長短自裁子欲爲我不能吾而效子亦敗矣雖然學我者易持效子者難將吾常道也觀其言知其行乾隆府志乃以竦頌莽斥之夫宰衡之奏陳崇實主之竦特

爲之草耳莽時諸生郎吏上書者千餘人何獨陳崇一奏
且美新之書出於子雲李固之死成於扶風漢書不加深
貶若必索瑕求類非善善從長義也今仍纂入

何比千字少卿敝六世祖經明行修兼通法律爲丹陽都尉
獄無冤囚淮汝號曰何公征和三年三月辛亥天大陰雨比
千在家日中夢貴客車騎滿門覺以語妻語未已而門有老
嫗可八十餘求寄避雨而衣履不濡雨止送出門謂比千曰
公有陰德今天錫君策以廣公子孫因出懷中符策狀如簡
長九寸凡九百九十枚以授比千子孫佩印綬者當如此算
比千年五十八有六男又生三子本始元年自汝陰徙平陵

代爲名族

後漢書
敝傳注

李忠字仲都東萊人以都尉奉光武畧地有功封中水侯建武六年遷丹陽太守時海內初定南方海濱江淮多擁兵據土忠招懷降附其不服者悉誅之旬月皆平忠以丹陽越俗不好學嫁娶禮義衰於中國乃爲起學校習禮容春秋鄉飲選用明經郡中嚮慕之墾田增多三歲間流民占著者五萬餘口十四年三公奏課爲天下第一遷豫章太守祠祀

後漢書本

傳

馬稜字伯威扶風茂陵人永元中江湖多劇賊以稜爲丹陽太守稜發兵掩擊皆禽滅之移會稽祠祀

按乾隆府志列之建初漢書本傳建初中稜始爲功曹其
守丹陽乃永元中也今更正

韓演舞陽人順帝時爲丹陽太守政有能名據大清一統志增

江漢永嘉初爲丹陽太守擊破賊陸官等據大清一統志增

陳後建寧二年爲丹陽太守時山越賊叛圍黃蠻擊破之據

清一統志增

張馴字子儁定陶人以明經學典領秘書爲丹陽太守有惠
政後遷大司農

按乾隆府志作子駿據漢書本傳改正

李崇毘陵人深遠奇博有君子之鑒明帝時仕爲宛陵令雅

重教化政務寬仁虎狼遠避蝗不入境民是用和遷汝南太

守據萬曆府志補

法雄字文彊扶風郿人舉高第除平氏長善政事好發擿奸
伏盜賊稀發吏人畏愛之南陽太守鮑得上其理狀遷宛陵
令永初三年徵爲青州刺史討破海賊張伯路等祠祀

抗徐字伯徐丹陽人鄉邦稱其膽智初試守宣城長悉移深
林遠藪椎髻烏語之人置於縣下由是境內無復盜賊

按後漢書法雄傳雄係安帝時人度尚傳抗徐以擊賊功
封烏程東鄉侯食邑五百戶桓帝詔增封五百戶舊志俱
列李崇上今改

孫吳孫瑜字仲異堅從子代弟翊爲丹陽太守爲衆所附至萬餘人加綬遠將軍從權拒曹操於濡須加奮威將軍領郡如故濟陰人馬普博學知名瑜厚禮之使將吏子弟受業創立學官臨饗講肄

吳志本傳

滕允字承嗣北海劇人爲丹陽太守上表陳及時宜及民間優劣多所匡弼每聽詞訟斷罪法察言觀色務盡情理人有窮冤悲苦之言對之流涕

吳志本傳

諸葛恪字元遜瑾之子孫權拜撫越將軍領丹陽太守時山民屯聚剽擄恪到移書屬城令各保疆界明立部伍不得與賊戰候賊殺熟輒縱兵刈之山民饑困出降因加慰撫由是

父老攜歸境內悉平以功拜威北將軍封都鄉侯

吳志本傳

程普字德謀右北平土垠人有計畧孫策以爲丹陽都尉居

石城討宣城涇安吳陵陽春穀諸寇悉平之

吳志本傳

黃蓋字公覆零陵人始爲春穀長轉丹陽都尉鋤強扶弱山

越懷附

吳志本傳

孫贛字伯陽策從兄初領豫州轉丹陽都尉行征虜將軍討

平山越

吳志宗室傳

晉鍾雅字彥臯潁川人歷北軍中候補宜城內史錢鳳作逆加

廣武將軍率衆屯清弋拒之時廣德人周玘爲鳳起兵攻雅

雅據涇縣收台士庶討玘斬之鳳平拜尚書左丞蘇峻作逆

車駕幸石頭雅流涕步從明年爲賊所害贈光祿勳祠祀

晉書

本傳

桓彝字茂倫譙國龍亢人性通朗有盛名明帝時爲散騎常侍丹陽尹溫嶠言宣城帶山阻川頻經變亂宜望實如彝者居之乃補彝內史有惠政爲百姓所懷蘇峻反遂糾義兵欲赴朝廷長史裨惠以郡兵寡弱山民易擾可按兵俟後舉彝厲色曰見無禮於其君者若鷹鷂之逐烏雀今社稷危迫義無晏安遣將朱綽討賊於蕪湖破之尋出石曉會將軍司馬流爲賊所破遂長驅徑進彝以郡無堅城退據廣德尋王師敗績遂進屯涇縣時州郡多降峻者裨惠又勸彝僞和以紓

禍幾不從曰吾受國恩義當死安能忍垢蒙辱與醜逆通問
其不濟命也遣將俞縱守蘭石羅爲峻將韓晃所敗死之晃
因進攻幾幾固守經年辭氣壯烈志節不撓城陷爲晃所害
諸子流迸宣城人紀世和率義故葬之賊平追贈廷尉諡曰
簡威安中改贈太常祠祀

晉書
本傳

陶汪回之子回從父猷常爲宣州內史咸康中汪復浚焉有
幹畧招隱逸廣學舍士民知嚮方者並辟爲掾吏百姓歌之
曰人常勤學得主簿誰使爲之陶明府

王象之輿
地紀勝

劉宋羊元保泰山南城人善奕品第三宋文帝與賭郡戲勝補
宣城太守先是劉式之爲宣城立吏民亡叛制一人不禽符

伍里吏送州作部若獲者賞位二階元保奏言亡叛之由皆出於窮迫今立殊制於事爲苦又等此制施一邦而已若其是耶則宜天下爲一苦其非耶不宜獨行一郡由是詔停元保廉素寡慾爲政雖無幹績而去後見思

宋書本傳

蕭齊王志字次道瑯琊临沂人以中書侍郎除宣城內史清謹有惠政郡人張倪吳慶爭田屢年不決志到官父老乃相謂曰王府君有德政吾曹鄉里乃有此爭倪慶相攜請罪所訟地遂爲閒田

按梁書本傳褚淵爲司徒引志爲主簿於時齊高已卽位則志爲內史在齊時無疑舊志以爲宋孝武末帙且表列

齊傳列宋體例亦亂今改正

謝朓字元暉陽夏人少好學詩文清麗齊明帝時以中書郎出爲宣城太守每視事高齋吟嘯自若而郡亦治嘗言煙霞泉石惟隱遁者得之宦游而癖此者鮮矣及領宣城境中多佳山水雙旌五馬遊歷殆遍詩曰高閣常晝掩荒堦少諍詞又曰幸遇昌化穆惇俗罕驚暴又曰察壤見泉脈覘星視農正又曰烹鮮止貪競共治厲廉恥又曰簪纓逢嘉惠教義承君子其勤民教士大畧可見至今稱謝宣城祠祀

齊書有傳事蹟仍乾

隆府志

蕭梁何遠字義方東海剡人天監中自武康令擢宣城太守郡

經冠鈔遠盡心緩理多著名蹟開涂巷葺墻屋民居市井城隍廡庫所構若營家焉秩俸並無所取每歲暮擇民尤貧者充其租調公清爲天下第一遷始興內史所至輒爲立祠

梁書

本傳

蕭勵蘭陵人武帝時宣城內史郡多猛獸爲人害及勵在任

獸暴爲息

大清一統志

王神念太原祁人歷安成武陽宣城內史皆著政績

據梁書本傳增

隋王選開皇中爲宣州刺史始營州之西北岡阜爲城剏橋宛

溪往來便之

舊國經

周超大業中任宣州刺史朱粲寇掠州郡超以州兵擊敗之

州以無事祠祀

明宏治各官題名碑

唐裴耀卿字渙之絳州人開元中山濟州刺史徙宣州日率所

管縣父老行禮奏樂歌白華由庚等篇明孝子養親萬物遂

性之義聞者感泣又以雅聲久絕請太常笙竽琴瑟令州造

習准令式行禮以勵風俗時稱良吏

採唐書本傳及南畿志合纂

班景倩衛州汲人開元中爲宣州刺史兼江南西道採訪使

有風力爲使踰年黜免賊吏以百計入爲大理少卿終國子

祭酒以儒名家

採唐書傳若水班宏二傳及明一統志合纂

竹承構開元中爲宣州刺史繼班景倩時號班竹其爲政務

戢奸宄黜貪黷境內以清

南畿志

裴惇復開元中爲宣州刺史政務大體不事煩苛稱良吏焉

同上

崔衍字著安平人第明經歷宣歙觀察使儉約畏法室無妾媵祿稍周於親族宣舊供金錫凡十八品皆倍值市他州民匱多逃去衍至蠲革之居十年節省用度府庫充牣及卒貧不能藏喪表諸朝賻帛三百段米粟稱之路應爲觀察使以衍有惠政在民言狀元和元年詔書褒美官一子諡曰懿

本傳

穆贊字相明懷州河內人歷御史中丞裴延齡屬吏受贓具獄欲曲貸吏贊執不可貶饒州別駕久之拜州刺史憲宗立

擢宜歙池觀察使先是劉贊刺宜竭州藏進奉結主恩崔衍代之大有儲積及贊代以錢四十萬緡假民輸賦故歲旱人不流通祠祀

採唐書本傳及崔衍傳合纂

盧坦字保衡洛陽人元和中拜宜歙觀察使時江淮旱穀湧貴或請抑其價坦曰所部地陝穀米他州若值賤穀不至矣不如任之已而商以米至至乃多貸兵食出諸市估遂平祠

祀

唐書本傳

路應字從衆平陽人龔國公嗣恭子用大臣子擢侍御史著作郎歷宜歙觀察使進封襄陽郡王至則出廩米下其估半以廩餓人蜀闢誅行軍千百五人於蜀李錡將反以間置鄉

兵萬二千人錡反命將期以卒救常湖坐牢江東心錡以敗
縛作響山亭營軍於左右權德輿善之剗其說於響山石居
五年以疾去檢其倉得石者五十萬餘府得錢千者八十萬
應之爲州逢水旱喜賤出與人歲稔以其得收常有贏利故
人不病饑而官府畜積

韓昌黎路
公神道碑

沈傳師字子言蘇州吳人登制科歷江西觀察使徙宣州傳
師於吏治明吏不敢罔愼重刑法每斷獄召幕府平處輕重
盡令乃論決常擇邸吏尹倫遲魯不及事官屬屢白易之傳
師曰始吾出長安誠倫曰可闕事不可多事倫如是足矣故
所至以廉靖稱性夷粹無競更二鎮無書賄入權家其僚佐

李景讓蕭寘杜牧並極時選

唐書杜
既濟傳

王質字華卿通五世孫開成中山河南尹徙宜歙觀察使清
白畏愼爲政必先究風俗在郡有惠愛奏聘署幕府者若河
東裴夷直天水趙哲隴西李行方梁國劉蕡皆一時選云

唐書

本傳

崔璵字廷玉平陽人會昌中爲宜歙觀察使闢學養士通商
惠民州人安之

乾隆
府志

按璵名附於其父頴傳尾略無事蹟其爲觀察使略見於
王龜傳惟嘉靖志載武平一宣州東門頌云禁令施恩化
溢建城市平街術附紀於末再龜係武宗時人則璵不應

在開元末今改正

裴休字公美濟源人擢進士賢良方正異等大中戊辰刺宣
州兼充闕練觀察處置等使休不爲觀察所治吏畏信祠祀

唐書
本傳

王凝字成庶舉明經歷禮部侍郎由河南尹遷宣歙池觀察
使王仙芝黨屠建德凝遣牙將孟琢助池守賊益兵來攻實
欲襲南陵凝遣樊倚以舟師扼青陽倚違令輕與賊戰不勝
凝斬以徇諸將聞皆股慄以死拒賊賊不能進時江南環境
爲盜區凝以强弩據采石張疑幟遣別將馬穎解和州圍明
年賊大至都將王涓自永陽赴敵凝謂賊乘勝而驕可持重

待之慎毋戰消意銳日趨四舍至南陵未食卽陣死焉監軍
收餘卒還走城沮撓無去意卒又恣橫不能禁疑讓之監軍
詞屈趣親吏奪民馬凝望見麾左右捕殺之由是不敢畱然
益儲蓄繕完以備賊賊至不能加會大星隕寢庭術家言宜
上疾不視事以厭勝凝曰東南國用所出而宜爲大府吾規
脫禍可矣顧一方何賴哉誓與城相存亡賊解去卒贈吏部
尚書諡曰貞幕屬司空圖有王公宣城遺事記祠祀

唐書本傳

張邈爲郡司功參軍開元以來良吏邈居其一有寒松貞玉

之操

陳簡甫記

張路斯穎上人年十六中明經第景龍中爲宣城令以才能

稱在官墾土田通水利至今城北有張路斯田南畿志大

柳鎮宗元父天寶中以事母棄太常博士求為宣城令政教

大行吏人立石頌德徙闕鄉考績成最拜侍御史號為剛直

祠祀據明一統志及昌黎集柳宗元墓誌銘台墓

崔陵字德長祐甫從子大厯中由東陽簿遷南陵令性介潔

疾惡如讐先是民私屠牛鑄錢賊殺吏卒莫可禁止陵嚴約

束有犯必刑盜遂解散吏籍民田糧失實賦多逋陵召諸父

老言狀悉覈得之積逋以完觀察使崔衍異其才當去復留

者七載歙州闕刺史府中賓佐並請行攝行惟遣陵祠祀大

統志乾
隆府志同

范傳真字西老順陽人寧國令元和四年攝南陵因廢股置

爲石堰三百步水所及者六十里

唐書地理志韋瓘大
農波記嘉靖志合纂

李孝稱天寶中由太平長徙涇縣令溫恭簡令行化遠二

邑民懷之遷宣州長史卒葬於涇子孫家焉廣德初盜起連

陷城邑李公之間獨完乃羣盜不忍相犯反與相保而存之

招討使袁傜異而奏聞詔贈宣州刺史

唐書
本傳

裴鐸太和元年爲涇令剛直慈惠民懷其德鐸修湖山桓公

廟韋煥記祠祀

乾隆
府志

韋煥有文學初爲涇尉後遷令保愛黎庶一邑化之同裴鐸

俱肖像於靈慧廟祀之上

同

〔南唐〕林仁肇建陽人由神武統軍爲宣州刺史兼寧國軍節度使始闢新城臨據溪山得形勢之便濠塹櫓樓一時皆具祠

祀

同上

張易字簡能元城人以宣歙招討使判宣州前刺史方築城役徒數萬易悉罷之曰自守者弱遠圖者強何以城爲吳越聞之懾伏不敢動

十國春秋

〔宋〕賈黃中字媧民南皮人開寶九年知宣州歲饑民多爲盜黃中出已俸造粥糜賴全活者以千數仍立弭盜法盜悉解去

遷禮部員外郎

宋史本傳

彭思永吉州人初爲侍御史皇祐時以直言改司封員外郎

知宣州時州政廢弛歲復大祲思永脩紀綱撫凋瘵甦流逋

奏課爲諸郡最

乾隆府志

按宋史思永字季長廬陵人侍御史皇祐祀明堂前一日
傳百姓皆進一秩時張堯佐覲執政王守忠求旄節思永
抗疏言之帝怒轉司封員外郎爲湖北轉運使不言知宣
州今姑仍舊志

劉安節字原成溫州人元豐二年進士初從程顥游與弟安
石齊名由右史出知宣州謹程式不事刑威遇下有禮人咸
樂爲用猾胥至相戒曰神可欺公不可欺州大水民疫乃親
給醫藥活人以萬計以勞卒官州人痛慕焉

採名宦題名及
乾隆府志合纂

李光字泰發上虞人建炎三年知宣州光以宣密通行都繕
城聚糧建義倉集六邑民兵保伍相比選擇健武萬餘統以
土豪號精檢軍柵險要二十三所嚴緊守戍釐守分地爲十
外巡內守晝各自便後遇有警迄賴以濟時范瑊軍過光開
門延勞三日去無敢譁者事聞進直龍圖閣安撫營內許便
宜從事金人奪馬家渡統制王燮王岷素不相能至是擁潰
兵城外索關光親至其營諭以先國家後私讐感悟解去繫
昌有水軍叛遣兵迎擊出其不意破之進右文殿修撰潰將
邵奇擁數百艘剽鄰邑光招諭之遺米二千斛奇喜悉無所
犯劇盜戚方攻城光射書遺其副將言戚方窮寇天誅必加

汝爲將家子何至附賊二人相疑攻少緩會救至賊潰遁去
賊方攻城時光置七首於枕中約家人曰若使人取七首我
必死汝曹宜自爲計毋落賊手事平除徽猷閣待制知臨安
厯官參知政事忤秦檜瓊州安置檜死量移郴州卒孝宗復
資政殿學士謚莊簡

宏簡錄
本傳

張果四川人紹興二十二年知宣州夜夢人告曰我陵陽山
土地也明日有大水沒城郭公可抵橫澗遇老人丐免果急
抱民籍至澗有老人橫笛乘牛來水暴至壑告弗答至再乃
問何由知具白以夢老人曰吾奉上帝命不敢違果抱籍入
水死城得不沒未幾冊載一樺浮至城北鐵冶里郡人求公

屍禮葬立祠城北嗣建大廟城中祀事弗替

大清一統志乾隆府志

任古定陶人紹興辛巳以御史直龍圖閣出守寧國時敵衆

四起古堅築城壘修飭戎器敵聞有備去後赴行在民數千

伏闕丐畱弗許

乾隆府志

趙愷乾道七年以慶王判寧國進封魏王置長史司馬長史

上言欲與司馬分治俾王受成愷奏曰臣被命判府今專委

長史司馬是處臣無用之地况一郡置三判官吏民紛競徒

見其擾長史司馬宜主錢穀訟牒俾擬呈臣依而判之庶上

下安事益易治又請增士人貢額朝廷悉從焉愷先心民事

嘗築圩堤之隕圯者帝手詔嘉獎淳熙初徙判明州

宋史宗室傳

李椿字壽翁永平人以父澤補廸功郎歷官至寧國節度使
推官治豪民僞券還陳氏田吏才精強人稱之後除集英殿
修撰知寧國府進敷文閣直學士致仕

宋史本傳

按椿傳無令寧國事乾隆府志分列府縣表中名宦傳又
列之推官一人三列殊覺紊亂表中又增一年字今改正
張忠恕字行父右僕射浚之孫嘉定五年由知湖州遷司農
丞知寧國府夏旱請於朝得賜僧牒五十米十萬七千餘石
常平使者欲均濟勿勸糶忠恕慮後不繼遂核戶口計歲月
嚴戒諸邑諭大家發蓋藏

原闕

所見寢異以言去主管冲祐

觀起知鄂州

宋史本傳

李道傳字貫之井研人嘉定中除提舉江東路常平茶鹽公
事與漕臣真德秀賑饑道傳分宣池徽三郡窮冬行風雪中
雖深村窮谷必至賴以全活者甚衆攝宣州守行朱熹社倉
法上饒新安南康諸郡翕然應命人蒙其利除兵部郎官辭
未就出知果州至九江卒詔特轉一官謚文節祠祀

朱史本傳

孫夢觀字守叔慈溪人寶慶中由泉州徙知寧國蠲逋減賦
無算泛入者盡籍於公帑戶曹嘗遣官督賦甚急閭郡惶駭
夢觀曰吾寧去官詎肯病民將以郡印牒所委官委官聞之
潛去其自奉清儉人謂如苦行僧理宗嘗問江東廉吏丞相
董槐首薦夢觀遷司農少卿寧國人言及輒流涕丞相吳潛

爲撰墓志祠祀

乾隆府志

杜範字成之黃巖人拜殿中侍御史辭不獲改起居郎渡江歸授江東提點刑獄改浙江力辭嘉熙二年差知寧國府明年至郡適大旱範便宜發常平倉又勸富公富人積粟發之民賴以安始至倉庫多空未幾米十餘萬斛錢亦數萬悉以代輸下戶糧兩淮饑民渡江者多剽掠其首張世顯尤勇悍擁衆三千餘人至城外範遣人犒之俾勿擾以俟處分世顯乃陰有窺城之意範以計擒斬之給其衆使歸四年還朝

祠祀

宋史本傳

王遂字去非樞密副使韶之元孫後爲金壇人淳祐元年以

顯謨閣待制知寧國府首革宿弊定斗斛置義役奏罷蕪廢
逃亡田稅親詣學宮訓厲多士載酒出郊勞農士民交頌之
日作民父母後王前杜累官工部侍郎謚正肅祠祀

按宋史本傳遂權工部尚書無爲侍郎賜謚事應附記其
事蹟亦仍乾隆府志史不載

文天祥字宋瑞廬陵人咸淳庚午知寧國府越月召還朝命
既下公臨四郊與郡父老告語作勸農文惓惓若慈母之愛
赤子文載藝文祠祀

二樓
記畧

胡宿字武平晉陵人登第爲揚子尉以薦爲館閣校勘進集
賢校理通判宣州囚有殺人者將抵死宿疑而訊之囚憚箠

楚不敢言辟左右復問久之云且將之田縣吏縛以赴官莫
知其故宿取其獄繙閱探其本辭蓋婦女與所私者殺其夫
而執平民以告也

據宋史
本傳改

李琮字獻甫江寧人登進士調宣州推官州庾積穀腐敗轉
運使移州散於民俾至秋償新者守將行之琮曰穀不可食
強與民責而償之其何以堪守愧謝而止

宋史
本傳

李堅知宣城縣縣雨水泉委滙每旱雨流潦輒傷禾稼堅躬
親相度峻爲之防使民就安利稼以歲登祠祀

明一統志

郭僕字同升祥符人建炎時知宣城縣苗傳劉正彥之變呂
頤浩傳檄諸郡僕說郡守劉珪募勇士倍道赴難揭榜仍用

建炎年虜人皆避之移判全州權饒州浮梁宰時有賊張頂花者入邑爲變邑官竄伏僎端坐屬賊遂遇害贈承議郎

宋史

本傳

梅正臣字均平宣城人堯臣弟也嘉祐中知南陵民多訟爭田乃先立版圖正經界吏民畏服罔罔爲空遷朝奉郎殿中

丞祠祀

乾隆府志

郭堯字高叔淳熙中以承議郎知南陵縣政尚慈恕申免工山鐵冶修復堰坡以資灌溉民永賴焉祠祀

南陵志

魏杞字南夫壽春人祖蔭入官紹興十三年登進士第知涇縣有惠政罷無名科費太平繁昌二縣共獲盜宰尉希功賞

日加煅煉賊誣引涇民五十三家祀馳檄取審得實悉縱諸
被誣者六年以錢端禮薦爲大理寺簿進丞歷官參知政事

右僕射兼樞密使薨諡文節祠祀

據宋史本傳及
江南通志合纂

林淳乾道八年以嘉議郎爲涇令甫至訪三農利病邑有陳
雷二古塘湮塞爲豪家分據淳議復之明年榜示鄉民修復

古塘凡六百餘所民大稱惠

大清一統志
乾隆府志同

王标字叔永濡須人嘉定庚午以宣教郎爲涇令初縣治多
水患标遷建於賞溪東之雷村民莫厭居修廢舉墜良吏稱

最祠祀

乾隆
府志

趙與穡德祐元年以宗室知寧邑五月癸酉元兵徇國興

種率衆守城出戰死之詔贈直文華閣吏楊義忠亦戰死祠

祀

宋史瀛國公本紀

陳樞長興人嘉祐初知旌德省刑薄歛興利去害民甚樂之

後以曾鞏論薦官至尚書

乾隆府志

練忠延平人元祐初知旌德政尚寬簡宏獎士類邑子弟如

汪解呂鏜皆所陶範雅負清操民間凡飲酒清者則相屬曰

此練長官也言其滴滴清云嘗建北渡橋以練公名之祠祀

同上

李宏字彥恢宣城人宣和初以左承直郎權旌德時州郡多
故調發勞午宏剗撥煩劇不遺餘力召集鄉勇訓練有方咸

樂爲用建炎間盜張遇寇江山進逼宣境州守呂好問檄令防禦遇知有備不敢犯好問薦其才可大用紹興初李光復檄署縣凡四載鋤滑興廢規制周詳後遷轉運使

按宋詩紀事去爲李好問所得士署涇縣餘與乾隆府志同

李延忠字居厚臨安人開禧二年以奉議郎知旌德創置學田八十餘畝捐縣市諸鄉地稅錢九千餘緡膳學宮弟子建縣東石橋及亭舍十餘楹名曰淳源士民德之祀三賢祠

府志

方備字士民歷陽人嘉定中以朝散郎知旌德修學校籍靈

源浮屠田三百餘畝以廩諸生建預備倉立平糶法賑民饑
又與縣庾立月椿以給祠祀

趙時賞咸淳元年擢進士第累官知宣州旌德縣德祐元年
北軍至時賞擁民兵捍戰有功陞直寶章閣軍器大監後從
文天祥空坑之役兵敗走吳溪爲追兵所執不屈死之

按乾隆府志時賞德祐元年以南陵丞攝事考之宋史本
傳無爲丞事紀年亦錯今改正

孫覺字莘老高郵人嘉祐中知太邑政先禮教儒雅自飭嘗
引鄉子弟於庭親爲講解經義移建學宮於縣東春秋釋奠
民用知學風俗浸美祠祀

乾隆
府志

陳汝賢乾道中知太平縣修學宮建勅書樓以簡正稱祠祀

同上

趙不吝太宗六世孫紹興間爲涇丞有平俞一功除德化縣

尹贈朝議大夫諡簡靜子孫家於涇

同上

劉誼字宜翁長興人熙寧初爲涇尉痛絕豪強悉繩以法既

去民思後以論新法被謫隱居三茅山

同上

呂誨字獻可洛陽人正惠公端孫也慶厯中任旌簿治民主

於受利而疾奸暴則嚴大抵槩以公平後以直諫顯祠祀

勝

景呂
堂記

滕珙字德章婺州人進士紹興初爲旌簿修郊升卿所建景

呂堂自爲詩當世知名之士屬而和之又考慶厯以來前任

名氏作主簿廳記勒於壁

二樓記畧

汪襄字公弼績溪人宣和中爲旌尉潔清愛民教場草深吏
白下保市取鐵爲鋤襄曰何爲擾民我家不遠卽遣歸取其
惜民財力類如此嘗捕虎棲真山除民害所作捕虎行邑人

傳頌

從萬應府志并旌邑志補

錢藻字醇老和州人胡安國高弟才識並茂爲旌德尉祠祀

用職官

表注補

元高睿河西人智耀子由嘉興路總管擢江東建康道提刑按

察使部內盜竊陸梁聲言圍宣城郡將怯懦城門不開睿召

責之曰寇勢方熾官先示弱民何所憑卽命密治兵衛而洞開城門聽民出入自便寇以有備不敢進遂討平之歷仕至南臺卿御史中丞卒追贈寧國公諡貞簡

元史本傳

按乾隆府志列之總管表中誤今改正

道童字德章唐兀人至正中由工部尚書出爲江東廉訪使緒城隍除戎器十五年斬黃賊陷徽州來犯宣州時禮部尚書汪澤民居宣州道童雅重澤民日就之徇守計城得無虞

元史汪澤民傳

劉耕孫字存吾茶陵人至正十五年爲寧國路推官歲饑勸富民出粟賑之活者萬計明年長鎗軍鎖南班等叛來攻寧

國耕孫與致仕禮部尚書汪澤民作守禦計耕孫分守城西
南日署府事夜率兵乘城固守江浙行省遣參知政事吉尼
哥兒來援至則兵已疲矣城恃有援不爲備夜四鼓賊攀堞

上城遂陷耕孫力戰死

元史本傳

鄧文原字善之綿州人有文學延祐五年由翰林出僉江南
浙西道廉訪使司事明年改江南道撮寧廣德三路歲入茶
課鈔三千錠等增至十八萬錠計竭山谷所產不能充其半
皆鑿空取之民間歲以爲常時轉運使官聽用鄉里狡獪動
以法誣民而轉運得專制凡五品以下皆杖決州縣莫敢誰
何文原請罷其專司俾郡縣領之不報撮民謝蘭家僮汪姓

者死蘭姪回賂汪族人誣蘭殺之蘭誣服文原錄之得其情
釋蘭而坐同時久旱獄決乃雨至治二年召爲集賢直學士

元史
本傳

吳師道字正傳蘭溪人至治元年進士第授高郵縣丞調寧
國路錄事歲大旱饑民仰食於官者三十三萬口師道勸大
家得粟三萬七千六百石又言於部使者轉聞於朝得粟四
萬石鈔三萬八千四百錠賑之三十餘萬人賴以存活遷建

德縣尹

元史
本傳

施正大涇縣白塔里人至元間丞相伯顏下江南辟爲本縣
尹初縣治在水西苦漂蕩正大徙於水東迄今利賴又學舍

鄰大安寺爲僧侵據正大興教諭賀桂孫請於按察使高睿

力清復之

乾隆府志

朱文魁字晦叔至元間由國子生爲涇尹時邑學草創益加完飭自爲記黃朱二宣尉討賊石門鄉文魁以身庇民民無兵擾在任六年以惠稱瀕行有別父老及山川諸詩祠祀

同上

呂良佐字唐臣爲涇尹頗著廉幹以誠信撫民仕終廉訪使

同上

蘇濟字汝舟益都沂人延祐中爲涇尹練達章程濬渠均賦修學宮鑄祭器復浮屠氏侵田餽諸生士民歌曰四民藝業通縣官有蘇公三載民無憂賴有蘇汝舟祠祀

同上

按梅震蘇公政績紀蘇公以延祐戊午到涇實仁宗延祐五年也乾隆府志列之至正誤今改正文詳金石志

王相字吾素廬陵人由翰林編修出爲涇尹首覈民田以見年爲準禁兼併平賦役江東憲司額外派征相代民告免上同劉性字粹中廬陵人天歷中進士至元初知旌德廉明剛果修學置祭器書籍年穀屢豐虎不入境邑民稱之祠祀上同

王楨字伯善東平人元貞初以承事郎知旌德六年謫永豐山齋蕭然終日清坐每歲教民種桑若干株凡麻苧禾黍牟麥之類所以蒔藝芟穫皆授之以方又圖書所爲錢鎛耒耜耜耨諸雜用器使民爲之名其書曰農器圖農桑通訣

觀闕立元

詩選
小傳

亦憐貞字顯卿至元九年爲旌德達魯花赤兼勸農事廉明

有幹畧崇學惠民卓然著績

乾隆府志

杜繼良爲涇主簿以勤幹稱縣尹王相覈田均賦繼良與有

績焉

同上

明黃榮祖字繼先號華峯浙江仁和進士性敏慧學問賅博癸

卯明大祖以賢良徵知寧國府遷建郡學修敏應廟設漁潭

河泊所於三汶河口又設南湖河泊所馬山埠時盜匿湖山

間所官兼司防禦民賴以安勅葬敬亭雙塔寺左祀名宦子

孫家於宣城

同上

楊觀乙巳年任寧國府知府時明祖初造軍興旁午屨字未立觀徙衙爲府治多所興作卒祠祀上同

陳灌字子將廬陵人太祖平武昌灌詣軍門謁見與語奇之擢湖廣行省員外郎遷大都督府經歷從大將軍徐達北征尋命築城泰州工竣除寧國知府時天下初定民棄詩書久灌建學舍延師選俊秀子弟受業訪問疾苦禁豪右兼併創戶帖以便稽民帝取爲式頒行天下伐石築堤作水門蓄洩護瀕江田百姓咸賴有坐盜麥舟者論死數十人灌覆案曰舟自漂至而愚民聞取之非謀劫也坐其首一人餘悉減死灌丰裁嚴正而爲治寬恤類此洪武四年召入京病卒祠祀

明史本傳

按癸酉志載灌卒葬城東州學舊址子孫家焉至今南街

有子將舊里坊

宋獻棗強人永樂初由戶部郎知寧國府廉謹有設施門無

私謁前後九年始終如一陞廣東參政民稱頌之祠祀明一統志

袁旭字廷輔江西樂安人進士初爲津江令正統初以輔臣

薦擢寧國知府時方多事旭應之裕如始官舍多仍元舊歲

久日敝旭悉新之改建府學壯麗甲諸郡創宛溪二石橋雖

洊興大役民不擾十年春大計羣吏始舉卓異之典旭與松

江知府趙豫預焉賜宴及襲衣遣還爲督學御史陳富所誣

幼與督橋工醫官苟存善同逮死獄中其在獄詩有云報國
有心懸白日蓋棺無面見黃泉聞者流涕至今父老稱賢守
者必曰黃公云祀濟川橋左并祀遺愛祠各宦祠

採明史趙豫傳及一

統志府志合纂

葉錫永嘉人宣德五年進士爲吳縣令舉卓異應遷奸民訐
於朝將逮繫吳人羣詣闕頌公乃令視事如故抵誣者罪等
擢寧國知府嘗自銘座右云清心省事責已恕人居數年部
無貪吏民用富饒陳司成敬宗贈之詩名齊岱岳峯尤峻心
比澄江水更清一時謂之寶錄祠祀

據明史本傳畧增餘仍乾隆府志

沈性字士夔會稽人天順戊寅由御史出任寧國知府裁冗

費省煩科姑孰有重役宣城歲往協濟積爲民病性癸改輸
費免役民困復蘇加意學校親課督諸生多士興起祀遺愛

祠

大清一統
志乾隆府志

涂觀字恒孚豐城人成化中進士由吏部郎出任寧國知府
承前守綜核名法之後政用寬平簡靜時有天降涂來解倒
懸之謠曾建祠祀陳廸時文廟鐘磬尊彝之類破壞殘缺特
請於太常卿劉宜致樂舞生鍾福慶錢永通二人來考正肄
習修置籩豆千簫簋簠銅若干於是器物具備聲文亦稱

探明史陳廸傳及
二樓紀畧合纂

黎福字天宇樂平人進士由御史出知鎮江太原調任寧國

廉潔峻整人不敢干以私與前任涂寬嚴異指而前後相濟
民均懷之仕至兵部侍郎祠祀

乾隆府志

范吉字以貞天臺人宏治初進士由郎中出任寧國知府爲
政平易造浮橋修圩埭雅意造士重節義孝行表章先哲復
修梅都官祠建景梅亭自爲記獨其才不羈爲文法所中去
郡人立碑祠祀

同上

胡東臯字汝登餘姚人進士正德中由刑部郎出任寧國知
府時徭役苦不均乃定大戶爲里小戶爲甲以一里統十甲
經歲而代閱九年然後復役人大稱便宜城有金寶圩素饒
沃久被水嚙漸受害東臯相便宜修築遂爲永利仕至僉都

御史祠祀

大清一統志

及宦宇士顯交河人進士正德中由給事中出任寧國知府
質直有清操政務大體高淳豪民以養馬援宣涇諸邑協助
撫臣將如議宣民大闢宦力爭之得免闕者罪止其首何隆
其餘戚景璋等九人俱編戍然卒以此被逮事白調懷慶民
哭送之立生祠焉仕至戶部侍郎先是宦爭馬政其父適從
北來止署外呼宦與言汝無得罪百姓異日可相見也飯於
廨後旋挾蓋躡履去其時已封給諫矣其父子清厲如此祠

祀

同上

劉起宗字初泉巴縣人嘉靖中由南京禮部郎出任寧國知

府負才彊敏嘗檄諸屬邑覈田數履畝丈量爲民均賦奸弊
疏剔狃涇縣水西精舍置田膳士聘名賢鄒守益王畿錢德
洪諸公講明正學一時人士蒸蒸嚮慕焉遷湖廣提學副使

祠祀

同上

朱大器字士充南城人進士嘉靖中任寧國知府政平廢舉
加意學校建文昌臺於府學之翼方復於旁構堂數楹課士
顏其堂曰辨志風教振興自奉甚儉燕食但龜菹數尾而已
仕至刑部侍郎祠祀

同上

方逢時字行之嘉魚人嘉靖中進士由工部郎中出任寧國
知府姿岸雄偉嶄嶄不可犯景王出就國所過陵轍守宰多

亡匿逢時獨往部署所需皆立辦取重囚鮮衣供事稍誤輒撲殺數人璫色沮逢時又向王面啓諸璫驕橫狀王爲引罪治數從者諸璫屏息江上諸郡得無擾大盜馬黨等越獄禱諸神逸盜踧踖待縛實廟下剗刑以祭數年間外戶不閉卒

祠祀

明史有傳事蹟仍乾隆府志

羅汝芳字惟德南城人嘉靖三十二年進士除太湖知縣遷刑部主事歷寧國知府民有兄弟爭產者汝芳對之泣民亦泣訟乃已初開元會罪囚亦令聽講入覲勸徐階聚四方計吏講學階遂大會於雲濟宮聽者數千人父艱服闋起補東昌移雲南屯田副使進參政守永昌坐事爲言官論罷在郡

日城涇縣橋西津勞績甚著祠祀

探明史本傳及南畿志合纂

王嘉賓字光國滕縣人進士嘉靖中爲御史太平周怡以言事廷杖嘉賓疏救之直聲大著隆慶中出知寧國府梓行文天祥勸農詞告誡父老懃懇三復涇妖民董代聚衆千人機兵捕治衆悉解散先是東溪以舟濟漂溺無算建造石橋四十丈民德之稱惠濟橋以艱去卽於橋左祠祀焉並祀名宦

乾隆府志

鄭繼之字伯孝襄陽人嘉靖四十四年進士除餘干知縣歷戶部主事郎中遷寧國知府強幹清勤堂皇整肅三門洞開小民得便出入陳說利弊一令貪墨立請巡按御史劾去之

其不可犯如此仕至吏部尚書贈少保

明史有傳事蹟仍乾隆府志

廖恒吉字雲衢四川夔州人進士萬厯中任寧國知府丁亥大水諸圩盡潰民幾爲魚時帑藏無可請者與縣令陳公相對泣下力上其狀於院司得改折緩徵更議勸捐充賑以百金爲倡凡得金五千有奇所全活者累萬餘六白金置腴田積穀備荒又餘則於文昌臺右建待學書院卽今敬亭書院也陞溫處兵備副使後家宜城卒葬北關外官山

採麻港待學書

院記及題名碑二樓記畧合纂增

蕭良譽字以孚漢陽人萬厯間進士由郎中出任寧國知府勸民力田敦孝弟嘗課諸生首識湯賓尹謂必冠南宮卒如

其言郡士與紳閭幾構大獄畧片言立解民安其鎮靜祠祀

乾隆府志

金勵字霜鐔河南西華人萬歷間進士由郎中出任寧國知府振風紀明正學折節諸生延施宏猷等爲講友獎拔寒畯置田膳之歲災力請貸蠲遣羅楚豫平糶穀值頗減民不苦

饑遷徽安兵備副使祠祀

同上

劉誠雞澤人成化中由長史調寧國同知砥礪風教以廉恭慈惠稱嘗修郡志秩滿陞湖廣參議祠祀

採名宦題名碑及乾隆府志合纂

石巍字民望曹州人成化末進士由武選司主事謫任才識卓犖雅尚氣節政治公平人懷之祠祀

乾隆府志

姜紹字玉卿弋陽人宏治二年南京御史劾守脩中官蔣琮
謫判桂陽量移寧國同知杜請謁抑豪強聽斷明允鄰境民
訟久不決白當路願屬姜郡丞由是委任叢沓訊讞咸服時
諺稱之曰寧郡司馬姜老愈辣擢知慶遠府祠祀

採明史本
傳及廣輿

記合纂

葉元貴溪舉人宏治十四年同知寧國以廉惠無傷稱祠祀

乾隆
府志

郭韶字克諧山西霍州人宏治十八年任寧國同知持法寬

恕而賦吏甚嚴推禮部郎父老立碑思之如姜紹云

同上

文敏澧州人永樂十五年由廣德知州謫寧國判以勤敏幹

濟稱祠祀

同上

陳紀字德廉臨海舉人成化中任寧國判奉職精勤清白自勵勸民田賦米以紓官田重困卒祠祀

同上

顏祿壽字天庇巴陵舉人宏治中任寧國判在郡久能習郡人語決獄悉得情實有持百金託左右貨帷中既覺斥還之暇卽短褐鋤圃一室蕭然遷安慶同知

同上

汪佃字有之弋陽人嘉靖中翰林侍讀議大禮忤旨謫判寧國廉正寡合崇好儒雅士林歸之廨中嘗構一枝軒咏嘯自如遷南京宗人府經歷

同上

李默字時言甌寧人進士嘉靖初由吏部郎謫判寧國博學

貢氣廉峭不阿往郡邑左遷至者率優游待報默獨勤職事
議減民田勸米慎征派省文移類多惠政嘗試士拔其雋者
引置左右每退食據北面坐抵掌談古今纏纏不休重建死
節尚書陳公祠築修郡乘矜嚴有體裁遷廣東僉事後見郡
中士民油然而若家人父子仕終吏部尚書祠祀上同

尹崇高泰和人宣德中由御史謫寧國推官論讞精敏吏民
畏服修葺學校有功士類後以均田坐宜州衛誣去人聲其

枉

同上

王樞字克慎歙縣人宣德中以貢士爲寧國推官有廉明稱
郡丁某嫂鄴氏少寡丁挑之鄴峻拒丁懼譖之母訟以不孝

已成獄樞得其情謂卽不惜一婦不惜寧國三年不雨乎力
爭乃得免南陵有富民賂顯要誣奪人山樞鞠實斷歸其主
未幾病卒民爭賻之其子曰不可以喪故污吾父却不受守
丞捐俸以助櫬始得歸祠祀

同上

燕忠字良臣薊州人進士宏治二年任寧國推官獄獄多平
反郡旱承檄發官廩賑恤有方民無流逋性狷介凝重寡言
笑人望而畏之擢御史祠祀

同上

雷禮字必進豐城人嘉靖十七年進士再補寧國推官性廉
儉論識明允涇豪民吳榮四與華六格鬪華死榮急播殺其
僕昇於華所以當之無何華六甦榮更愬華殺其僕論死禮

廉得實曰此榮故殺反誣耳華得釋間以文學節吏治嘗爲敬亭山賦倚撫載籍敷揚風土一時傳誦以艱去厯官工部

尚書

同上

毛愷字達和江山人嘉靖中進士以御史言事謫寧國推官峻潔嚴明擊斷豪黠郡吏凜凜敦崇正學與所部人士相講

肄折節備至遷南京工部主事厯官刑部尚書

同上

李惟觀字動可瀘州人進士嘉靖中爲寧國推官時盱江羅汝芳知府事倡明正學與士民更始四封鄰鄙翕然風動惟觀一志協恭緩刑尚德紆誦聲比戶焉及汝芳以憂去觀兼署郡邑寬嚴悉當郡稱無事謀最擢御史

同上

王藻字國華真定人隆慶二年進士爲寧國推官廉明無失
刑及攝宜邑事念賦役多弊藪小民坐困時條編法未立藻
畫一經始更爲最奸禮賢下士惠及工商翕然稱美擢御史
張嘉言湘潭人進士萬曆三十年任寧國司理嘗攝郡力遏
大璫清稅事風裁甚著建天柱閣置田課士上同

黃尊素字真長餘姚人萬曆丙辰進士任寧國推官性嚴明
執法不阿豪貴公餘則引生徒講課士類興起以治行擢御
史遇事敢言與楊左諸人以氣節相砥礪坐忤璫死詔獄崇
正初贈太僕寺卿福王時諡忠端

採明史本傳
及廣輿記纂

鄧啓隆安福人天啓初進士爲寧國推官清苦自厲嘗他出

家人誤受一紳士香薪追還之內召掌銓者戒無以難忤時
啓隆抗聲曰欲貶吾操有脫屣去耳時嚴寒見所服袍四綠
皆蠶繭益歎服擢御史巡鹽兩淮括夙儲數十萬充國用時
寧民例行綱鹽苦騰貴叩閭請改食鹽事下覆議啓隆悉寧
國疾苦改從民便至今德之

乾隆府志

漆嘉祉字蔚生江西新昌人崇正間進士任寧國推官嚮指
不染疆禦不畏多方卹饑民全活甚衆時有邑丞貪肆嘉祉
斥之士民胥悅遷兵部武庫司民立專祠祀焉

同上

王文質字有章號龍里六安州人明初甲辰用陶安薦知宜
城縣事時兵革初定井里蕭條文質撫綏招徠教士勸農具

有方畧民始安集乃建縣治徙縣學於太和門內創建水陽
巡檢司署設各鄉講約所以時巡訓飭諭修新稔等壩水利
以憂勤卒官士民德之葬宜城西郭外祀名宦子孫遂家焉
曾孫璘由廩貢任耒陽簿十三世孫萬年乾隆甲子舉人同上
孫琳絳州人廉明剛果善撫字去後民思之祠祀同上
蕭吉泰和人洪熙元年由廣東知縣調宣城識幹明敏優習
吏事嘗修學舍建會膳堂一時廢闕多所興舉後以事去官
爲時所惜祠祀同上

況子玉瀘州人監生正統時以薦知宣城值歲祲多方賑貸
民賴以全性剛果遇事敏斷九年秩滿邑人伏闕請留卒於

官祠祀

同上

李端字表正棗陽人進士成化中知宣城有吏才尤能抑強

鋤猾摧監察御史

同上

李延壽字宗仁新城人成化中由御史謫宣城簿量移知本

縣忠勤修政簡靜宜民境內安之

同上

樂護字鳴音臨川人進士宏治中知宣城廉明有幹局饑民聚黨肆劫護單騎行村落撫諭之感泣而散因咨訪畫策計口以賑太平鄉民甲乙相善戲搏擊乙誤中甲甲歸語其妻妻與所私者夜殺甲誣乙抵死護閱牘見甲兩耳後重傷曰豈有傷若此尚能忍死歸無一人見耶召其妻窮鞫之得實

乙獲免入覲遇盜發笥止銀四十兩日久聞宜城樂青天乃
汝耶還之而去擢給事中同上

吳悌字思誠金谿人嘉靖十一年進士除樂安知縣調繁宜
城倜儻有才討明學術爲政首重倫紀有夫鬻妻者必還妻
而懲其夫歲稔出公帑令強幹吏糴之封外糴之封內民以
無饑用介特忤當事遂借前令逋賦爲悌罪邑人懼失悌爭
爲完逋而悌亦怡然尋擢御史歷官刑部侍郎卒吏部尚書
孫不揚聞悌理學名臣用黃孔昭例贈禮部尚書諡文莊祠
祀明史有傳事蹟
仍乾隆府志

周奎字象賢萬安人進士嘉靖中知宜城廉儉惠愛初到官

歲大稔發廩出帑推鄉士大夫之忠信者行各里散給民不入市並需實賑全活甚衆尋病卒橐無餘金士民痛之欲罷

市祠祀

同上

姜奇方字孟穎湖廣監利人進士隆慶五年知宜城周悉民隱事有利病皆興革之建預備常平二倉貯穀待賑創水陽諸版斂粟待兌至今軍民便焉宏獎儒術延接討論不倦宣士彬彬向古遷戶部主事祠祀

同上

啓事講字明甫江西樂安人進士萬厯中知宜城嘗盡發儲粟三萬石賑民饑又勸大姓義輸多者表其門丈量令下里甲騷然事講履畝核盈縮姦猾弊息田溢額而稅如故好獎

文學壬午歲鄉舉八人皆舊拔士時稱藻鑑擢御史督南畿學政增宜邑錄科額十名祠祀上同

陳公相字子顯漳浦人進士萬厯中知宣城坦易剛直吏民畏服歲仍旱潦拯救多方改折漕粟二萬石以去就爭卒報可建待學書院置養士田文治大興去後民尸祝之上同

盧維屏字建台山西忻州人進士萬厯中知宣城清介有風力時里役之弊私費倍公賦維屏置廳庭中細民得自納煩費頗省更後則以田丁爲差河墻地歲墮而租故在悉核蠲之修築新稔石陂免新河庄竹木雜稅禁賭博治奸宄用法雖嚴而禮士惠民多治績遷禮部主事邑有專祠上同

鮑國忠字爾進綿竹人萬歷中進士知宜城年少有特操顯
勢避影不敢近歲潦則賑恤無告嘗割俸市田金寶圩爲邑
校恒產士庶悅頌坐他累左遷時論惜之

同上

梁應奇字平叔四川嘉定人崇正庚辰進士知宜城勤幹有
餘力修堰濬渠必親驗視歲大旱編衣徒步爰禱得雨如注
續苦蝗日走四郊督捕許以蝗易倉粟復許代贖鍰蝗竟絕
又疫起給醫藥時方多故詔所在儲備改城增戍積穀繕械
實政可紀擢刑科給事中後兵亂城閉卒賴其儲積以固守

有專祠

同上

余颺字庶之莆田人崇正丁丑進士知宜城擅文名好容接

士類潔清自矢莫敢干以私一時諸生負君宗之目如沈壽民梅珮中麻三衡禮遇尤至振以古學季考月課多所造就以艱去厯官吏部主事

同上

梅鼎鳳陽人洪武初由南省掾知南陵漕政嚴明不事筭朴吏民不忍欺力除屯田民尤永懷祠祀

同上

甘潤黃州人洪武初知南陵性寬厚禮賢敬老周恤無告修舉廢墜摧蘇州同知父老泣畱因寓縣中卒葬東門隅祠祀

同上

胡文靜字士寧山陰人進士正德中知南陵才敏達應決如流政寬簡裁冗費歲大水多方賑卹民賴以生尤加意庠序

任二年調吳縣尋擢御史祠祀

明一統志
府志同

張忠任邳人嘉靖中知南陵性醇厚撫字有方力請免荻江
三山驛通借役夫差大爲民惠自奉儉約賑貧恤孤綽有餘

愛祀名宦

同上

李初元營山人嘉靖中知南陵嚴明廉謹燕居必飭甫下車
鋤去豪猾境內肅然先是歲連旱餓莩籍野初元至曲意賑
貸捐金市穀平糶全活甚衆三年擢御史去囊篋蕭然祀名

宦

同上

楊九韶餘姚人進士嘉靖中知南陵奏蠲養馬八百七十匹
邑免賠累又築堤爲圩凡十餘所瀦洩有法至今利賴祠祀

大清一統志

江南通志

周詩字汝學錢塘人進士嘉靖中知南陵歲潦力請免逋負數千民忘其災邑白繁昌私以馬寄養遂至責種馬七百餘匹府議量減雜派日久復重徵詩具言疲邑獨累狀乞申前議代邑民劉瓚等草疏請豁種馬言甚詳切牧害少息覈奸民欺隱田千餘畝賦稅以均等艱去除服擢給事中

採樓紀畧及

乾隆府志合集

邵永春字子元長坦人進士嘉靖末知南陵剛方敏決樂善好賢創建縣城徙治學宮暨明經閣覈田畝清賦役民困官馬議請蠲價蘇之民頌再造三年召爲監察御史祠祀

乾隆府志

沈堯中字瀛臺嘉善人進士萬厯初知南陵墾荒築堰濬川
瀦陂礪确皆爲沃壤又著砭俗要略喻化陋習時進諸生校
課授經嫻形家言疏泮水臺籍山橋北河無不與學校相表
裏以才見忌厯任六年僅徙蘇州丞祠祀

同上

杜繩甲號皖賓富順人舉人崇正中知南陵爽愷無隱情善
決獄案無宿牘嘗自言居貧苦讀狀獎勵後進羣士被賞拔
得雋者甚衆至今稱永鑑云遷鎮江同知

大清一統志

薛惠魏縣人監生永樂中知涇剛毅有爲凡奉上檄惠之綽
然減無藝科歛遇俗賽神者禁之曰此褻神也修文廟振士

習合邑德之

乾隆府志

強珍字廷貴滄州人成化二年進士除涇縣知縣請減額賦

民德之擢御史祠祀

明史本傳

王弁字士瞻吉水人進士成化中知涇勤幹愷悌有古循吏風歲大饑并請蠲貸當事不許遂自疏請諸朝民賴以蘇祠

祀

同上

包義民合浦人進士宏治中知涇廉靜寬裕吏不能爲奸民爭訟輒溫語慰解使自三思訟者多罷去不肯飭廚傳媚上

官尤近世所難祠祀

同上

李鸞字天瑞固安人進士宏治中由御史謫知涇吏材明決鄰邑訟獄多就質成建尊經閣譙樓桓簡公祠置義塚掩骼

幣造浮艘濟上下坊諸所繕舉甚衆遷知和州

同上

賈啓字啓之黃岡人進士正德間知涇爲政嚴明事至卽決

邑雖煩劇而公庭闐寂民有官清吏暇之謠擢御史祠祀

同上

鄭氣字浩然北直靜海人進士正德中知涇坦易明敏吏不

敢欺凡事存大體不苛細擢御史祠祀

同上

胡永成字思貞安福人進士嘉靖中知涇敏斷有爲崇獎俊

又科第得人爲盛士歸其功清里籍祛蠹弊積粟萬餘石歲

祿賴以賑給祠祀

同上

陳守仁號我山德化人舉人嘉靖中知涇有清操敦尚風教
著諭民集訓申述古禮以艱去賄賂皆不受芻衣以行民頌

之曰前有賈鄭後有胡陳

江南通志

鍾紐號東岑永豐人舉人嘉靖中知涇政崇寬簡大暑節愛
二字於堂嘗捐俸斃路十里造下坊渡浮橋其清苦始終如

一以調去

乾隆府志

劉世亨字以進臨川人進士嘉靖四十五年知涇勤化導嚴
法紀省費均徭置田養士以優異徵去之日邑無少長皆兒
啼送之至采石猶數千人其語在采石泣別碑中邑人思之
爲立祠並祀名宦

同上

李日文號穆吾金谿人進士萬厯中知涇嚴明方正嘗履畝
覈田役賦均平重建明倫堂移蕪湖兌倉置郡城公署皆捐

俸爲之約已裕民不事表暴在任八載遷工部主事祠祀

同上

張堯文字復吾新淦人進士萬厯中知涇簡易寬和而發摘如神雅尚理學復水西書院祀田歲連稔設法賑貸全活不

下萬家遷南京兵部主事

同上

陳大綬號赤石浮梁人進士萬厯中知涇清正不阿民用寧

輯其所拔士相繼取巍科遷南京兵部主事祠祀

同上

何廷魁字汝謙山西威遠衛人萬厯二十九年進士授涇縣

知縣調寧晉歷官衛輝河南黎平知府遷副使分巡遼陽遼

陽破懷印卒二妾投井死贈大理卿諡忠愍

明史本傳

李邦華字孟閻吉水人進士萬厯中知涇天性忠孝負經濟

才爲政嚴明廉靜嘗以母虐斃獨母畏高明揭諸廳事救荒賑乏清惠著稱六年擢御史累官左都御史李賊犯闕抗節死之

按乾隆府志孟闇作懋明據明史本傳改正傳稱知涇有異政行取擬授御史值黨論起羣指目爲東林越二年而後拜命

高承埏號寓公秀水人進士崇正中厯遷安寶坻令有異政軍功璽書褒美謫涇端毅有威望定踐更均郵遞革耗美絕餽遺講學造士訟簡民安涇人歌曰琴溪水清且芬出山阜青入雲誰其比高使君等擢工部主事民又歌曰盼公車來

何暮計公程去何駸公內召我何之急攀轅見上司上司揚

言不可止入都門見天子祀集賢祠

採江南通志及明詩綜合纂

尹民興字宜子嘉魚人崇正初進士歷知寧國涇二縣除奸
釐蠹有神明稱行取入都爲陳啓新所許謫福建按察使檢
校十五年召爲職方主事擢郎中周延儒出督師命從軍贊
畫延儒被譴下吏久之始釋歸流寓涇縣南京失與諸生趙
初浣等據城拒守城破走免唐王以爲御史事敗歸卒於家

明史
本傳

王普洪武初知寧邑遭兵燹官署蕩燬普爲營繕規畫有方

飭舉法度民獲安業祠祀

乾隆
府志

張居敬繼王普任補所未備一時民並稱之祠祀

同上

聞人琚字德夫餘姚人進士成化中知寧邑勤撫字治邑如

治家視事三年境內清理祠祀

同上

王廷相字子衡儀封人宏治中進士博雅知名正德中以御史謫知寧國縣器度宏濶以文學節吏治期月間百廢具舉事關民隱必力爲之寧邑人材希濶賴其訓迪乃蒸蒸焉仕至左都御史兵部尚書加太子太保諡肅敏

按明史本傳廷相凡兩謫官一亳州判官量移高淳知縣一贛榆丞而朱竹垞明詩綜小傳廷相以監察御史巡按陝西爲鎮守廖鑾誣奏下獄謫贛榆丞稍遷寧國同知皆

不取謫寧國縣事江南通志又作由庶吉士謫任應附記

王庚字文祥灤州人進士嘉靖中知寧邑正直坦易有訟必

從容譬解使自歛服尤善折疑獄徵爲給事中

乾隆府志

陶允明會稽人舉人萬厯中知寧邑剛柔相濟勤勞撫字修

起蕪廢境內晏然

同上

水卿謨鄞縣人進士萬厯中知寧邑嚴明果斷吏治肅然民

德之祠祀

同上

陳伯龍萬厯中知寧邑銳意鋤奸勵精舉廢時大校勸民義

輸以賑全活者衆捐修東津橋民甚德之祀前令水侯祠

同上

祁承璞字夷度山陰人彪佳之父進士萬厯中知寧邑抑豪

強恤焚獨人不敢干以私時與士子講業多所陶淑

同上

吳壽字子才處州人洪武初由御史謫知旌德廉明果斷民

追思之

同上

譚青字彥白南豐人舉人永樂中由訓導擢知旌德通敏好學鋤猾摘奸歲饑開倉賑卹百姓德之徵授給事中民詣闕乞畱從之又三年乃去

同上

田穀字景善高密人舉人洪熙元年知旌德公明果斷興學敬老不事刑威歲饑發廩賑貸以艱去宣德間從旌民陳乞

復任

同上

舒謨樂平人進士宣德中知旌德慈惠廉敏不事刑罰百姓

愛慕後擢御史

明一
敘志

曹祥字志和河南獲嘉人景泰中由福建副使謫任旌德明
敏公廉百廢具舉興學講禮疊疊不厭民有弗率輒以理訓
格吏民懷畏以艱去祠祀同上

馮本慈谿人監生正統中知旌德奉職廉惠凡所建立皆足

垂範祠祀

同上

彭賢臨潁人監生成化元年知旌德涖政嚴明豪奸屏息寬
逋負均徭役加意學校捐備祭器卒官同上

尹清字周潔富順人舉人成化中知旌德操持廉介平易近
人修縣志重文事秩滿士民泣送之祠祀同上

顏珀晉江人進士初知虹縣正德三年補旌德廉明公恕尤勤積儲合郡歲饑旌獨不害厯仕至南京戶部侍郎屬旌民轉輸至部部郎橫索珀念舊治赤子又不欲暴屬官短遣家僮餉壺餐焉部郎大驚卽放還父老嘗樂道其事同上

朱寶昌高安人進士正德四年知旌德豁達知大體初作大命倉廣儲蓄民蒙其利同上

朱概豐城人進士正德八年知旌德歲旱饑疫手自疏記上部使者請蠲賦稅數爭得之奸人援倚貴近索債於縣民詬怒扶傳吏概使謂曰予令瘠邑常恐賦不供義不爲奸人索私負其人知不可脇乃去後以艱歸民追思之同上

張鳳翽寧州人舉人嘉靖三年知旌時高淳奏派養馬旌民
洵懼翽抗言山嶺非芻牧之場因服詣軍門力辨得免涖政
明決案無畱事獄無繫囚以才調丹陽就道行裝衣履而已

同上

杜鏗鄞縣人進士嘉靖十二年知旌德自奉粗糲其妻坐草
署無宿舂解衣日質米數升清苦如此調上海令

同上

甘澧蘄州人舉人嘉靖十三年知旌德時條編未行裁省厨
傳寬里甲諸費有中貴過縣索供帳橫甚澧遣使致常廩吏
不敢往澧乃易吏服往見中貴怒呵曰令安在澧曰邑如懸
磬不足以犒從者令遁矣中貴度無所得乘傳去其他廉愛

不可悉舉

同上

盧洪春字思仁東陽人萬厯五年進士授旌德知縣初政尚嚴悉取豪猾置之法後濟以寬故民畏而見德丈田令下洪春以才畧兼攝寧國建言裁縣丞置三溪巡檢司復古制縣廨院署俱易湫隘爲爽塏擢禮部祠祭主事以帝久不視朝上疏廷杖斥爲民光宗嗣位贈太僕少卿

明史有傳事蹟仍乾隆府志

蘇宇庶晉江人進士萬厯時知旌德臨事割斷糾剔奸盜賑荒課士獎重節孝重建蕪湖倉規制宏厥漕粟無朽蠹焉有

專祠

乾隆府志

張時獻南城人舉人萬厯中知旌德革耗羨勸農桑中使以

開採至供億不貲悉從官辦絕不擾民廉勤日著大計當課
最鄭司理以那解錢糧難之義民周雄昌劉光裕等一夜代
輸五百金其得民心如此乞終養去

同上

宗敦一號凌霄四川人進士崇正五年知旌德政崇簡易禮
士愛民巨盜呂大祚等剽掠行旅悉擒治之建官廨役不累

民擢御史

同上

喬明旂永城人進士崇正末知旌德剔邊奸盜外戶不閉捐
貲築堰以通水利邑人祠之爲人嚴毅遇文士輒優禮焉遷

戶部主事

同上

柳世榮洪武初知太平縣首務清理田糧黃山峭壁田不可

耕者申請免兌糧一千五百八石民賴其惠祠祀同上

孔文昭洪武元年知太平時喪亂之後文昭始置縣治設學

校鳩集流散戶口日增祠祀同上

李簡洪武二年知太平奉制建諸公署極意撫字民忘其勞

政譽卓然祠祀同上

梁德遠洪武二十五年知太平洞悉民隱蕪田通稅悉折收

輕齎以恤其困民肖像祀之并祀名宦同上

蔣忠錢塘人正統間進士知太平省賦輕徭民用不匱祠祀

同上

張瀚字克容博平人宏治中進士知太平聰敏清勤興廢補

敝大得物情嘗積穀備賑興學育才邑數十載稱治績者必

曰張君云祠祀

同上

劉元凱號雲鶴閩中人進士嘉靖中知太平才敏識達行政以救時爲急毀淫祠崇正學禁溺女峻懲豪橫歲累稔悉力調劑賴無流遺民樂其清簡訟獄衰息重修文峯書院更名天都公餘輒坐嘯溪山引諸生上下古今人愈賢之調蔡浙

江祠祀

同上

馬維銘字新甫平湖人進士萬厯中知太平爲政不尚深刻與民休息三府會館太平視石埭縣獨遠建議協濟夫馬勞費瘼均邑人永便專祠祀之

童學賢字養所餘姚人天啓七年知太平歲游饑亂民結羣橫掠學賢設方畧擒渠魁散餘黨地方以寧歛編修吳孔嘉誘族人吳養春僕告其主隱占黃山學賢廉幹明決不爲強鄰所懾邑得無擾察邑積弊詳請更除民建祠祀之上同

吳中穎字支機烏程人舉人崇正三年知太平清約端方布袍蔬食革火耗省差役奸僞寢息居二年以不善事長吏挂

冠去祠祀上同

郝明徽雲夢人舉人崇正十四年知太平癸未左良玉兵恣橫降叛盡假其號沿途劫掠將及境明徽料城池簡丁壯築隘口張聲勢賊不敢近民賴以安上同

法寰號開三膠州人舉人崇正末知太平威儀容止動有矩
則痛懲貪鄙凡火耗誣命陋習一切剔除時饑饉相仍多方
賑恤全活無算至修文廟造泮水橋加意士林人多懷之祀

名宦

比同

陳雅晉江人正統中爲宣城丞嘗攝邑事遇亢旱度禱荷校
日中自責曰皇天不下雨陳雅不開枷已果大澍歲登致仕

歸邑人泣送境外

高繼志

李福靖州人監生宏治八年爲宣城丞有廉操嘗外出有私
餉其家人豚首者福歸取諸釜中還之

乾隆府志

蕭山荆州人監生正德中爲宣城丞以廉直忤當道罷去不

能具行李編修邵銳時爲推官贈以詩有去馬人爭挽歸囊

月共寒之句

同上

李文字載道嶧縣人監生宏治中爲宣城主簿潔已奉公初
邑文廟以附府輟祀文始行春秋釋奠禮因著爲令捐俸創
雙溪石梁至濤其家驟車以充費屬兄子賢督焉橋成以艱
去宣民德之名李公橋知縣樂醵贈以詞云李公橋下水長
流利在千秋譽在千秋

南畿志

謝文祥字元吉耒陽人成化中以御史言事謫南陵丞方正
有節嘗驅冗吏歸農刑獄清簡詣學官與諸生析大義闢異
端屏後建後樂亭暇則觴咏其中以抗直去官祠祀

乾隆府志

林文瓊江山人歲貢生嘉靖中爲南陵丞刻厲清苦不攜妻
孥時與士人講明正學出俸贍貧民後棄官去士民泣送之
有貌古心亦古節苦身更苦之頌同上

胡惟幾字彥民定遠人洪武初爲涇丞創建縣治招撫流離
造公廨修學校治有條理尋卒同上

王濬字文深商水人進士成化中由御史謫涇丞時邑事久
弛毅然更始鋤強植弱清賦稅通錢法學校壇廨橋梁多所
修建身如冰立吏卒凜然同上

楊孟春新泰人貢士嘉靖末爲涇主簿慈明廉介卻里役例
餽朝夕蔬食間以俸代貧民輸贖臺司委訟鞠斷明允嘗條

陳十三事觸時忌拂衣去

同上

周倫吉水人正統中山辟舉爲寧丞律身廉謹悉有程度於學校尤惓惓焉遷鎮南州同知

同上

彭明甫字則誠萬載人監生嘉靖中爲寧丞約已愛人去之日敝衣數襲而已

同上

葉洪字子源德州人嘉靖八年進士擢工科右給事中論吏部尚書汪鋐奸忤旨奪俸明年考察鋐修怨坐浮躁貶寧丞居二年復以大計奪職言者屢訟寃不復用

明史本傳

黃永清寧遠人永樂中以掾爲旌丞廉謹自持上下信之知

縣譚青尤嘉其翊贊焉

乾隆府志

藍之鼎巴陵人崇正十六年任旌德典史以廉能聞乙酉江寧城亡兵逃寧邑殺掠甚慘將及旌鼎率民兵守邑之烏嶺新嶺得不擾民甚德之

同上

鄧鏞豐城人嘉靖中爲寧國教授篤志經學每講說抉異發疑娓娓不倦遷漢陽令

同上

王龍融縣人嘉靖中爲宣城訓導九年遷令去復調寧國教授狷介不苟矜尚名節三年擢國子博士祠祀

同上

馬德澧字以容平湖人萬厯丁未進士授寧郡教授梓其父檢身教家二箴躬行傳說爲諸生先歲時勤課於貧窶者捐俸給之遷國子博士歷官刑部郎中卒贈太常少卿

乾隆府志作平

和入陳朱竹堤明
詩餘小傳改正

魯光魯字子魯博山人萬歷中進士任寧郡教授時知府蕭
良譽重光魯文學推官朱吾弼魯所薦士課士讀書外一無

干請時稱峻潔乾隆府志

宋名世商邱人萬歷進士任寧郡教授剛正不阿會督學御

史熊廷弼繩士嚴酷名世力爭多所矜全丰裁稜凜同上

張崑字廷瞻上虞人舉人宣德中爲宣城教諭每對諸生必

言朝廷命官立教之意開陳聖學首重孝弟秩滿楊文敏榮

薦之遷當塗令擢南京御史同上

劉燕安福人舉人嘉靖中爲宣城教諭敦尚古道清儉自厲

獎誘雋士倦切不怠遷推官上同

劉延齡字雙鶴綿竹人舉人萬厯中爲宜城教諭督課無寒暑出以至誠諸生貧者還其費並割俸餼之自樹尤嶽嶽焉諸子成進士爲顯官言及宣事輒流連不置祠祀上同

任倫字秉幾監利人進士宣德中擢御史以母老乞近地教職迎養得南陵教諭材優行廉長於吟咏教人先德行後文藝學官地以歲俸倡修廟宇一新祠祀上同

何昌字謬卿南海人舉人成化末署南陵教諭兩分闕校爲人端鯁訓諸生有面督無背情所造多佳士嘗陰於當道白民冤其人詣謝拒弗受遷建寧府判上同

陳敏中字午賓武進人舉人萬厯中署南陵教諭不干有司

適徐生悞觸邑令爲抗言直之不受餽學田以歲被漣租將

鬻以辦賦敏中悉心規畫田畱賦充還國子博士

同上

姜志峻字伯升丹陽人貢士崇正中任南陵訓導見學宮毀

圯人文寥落毅然以振作爲己任倡建明倫堂及學前兩坊

又興五經社於天香館每月兩課選其尤者彙梓成集臺使

薦擢武義令

同上

劉恒吉水人貢士正統中爲涇教諭雅負經學造士精專一

時科第多闕人建學宮不煩有司遷襄陽教授歷翰林檢討

祠祀

同上

陳垣字子崇臨海人貢士宏治中爲涇教諭文行並懋端已
範士盛暑夜坐必整衣冠却歲時常儀例不可却者儲修廟
學自奉菲薄時周婁士遷助教士大夫攀送數十里不忍舍

勒碑學宮祠祀

同上

莫天淳字衷孟華亭人舉人崇正中署涇教諭弟子進謁不
問贊而問業頗精賞鑒有秋水寒潭之號又疏道士湖水向
學宮士風興起尋遷仙游知縣歷刑部郎中

同上

王暹字養明吉水人少從羅文恭公遊萬厯初以貢士爲涇

訓導問學深遠勸導古禮綽有師範

同上

張繼哲字克明麻城人嘗受業於天臺耿先生之門萬厯初

由貢士爲涇訓導讀書談道充然自得爲文根據理要多士

嚮慕

同上

劉士焜號石渠靖江人貢生崇正中爲涇訓導善談論與諸士言古今忠義慷慨淋漓復啓聖祠建洗心亭飭顏廡修圮坊遷知縣歷同知殉難死

同上

周泗蕪湖人貢生崇正十六年爲涇教諭勤謹飭士踰年城破自縊於明倫堂側

同上

劉守中字禺中懷寧人貢生崇正十六年爲涇訓導沉毅有爲後署縣篆城破懷印死城濠中

同上

王皞安福人貢生爲鄒文莊守益同志友學有淵源嘉靖中

任寧邑訓導建鳳山書院進諸生討論聖學寒暑不輟嘗輯四禮纂要刻行士習一變同上

樊玘糾雲人貢生嘉靖中爲寧邑訓導巡教諭坦易和厚嘗捐俸與鄉大夫袁澤重建廟學堂齋多士德之同上

郭宗伊文登人貢生嘉靖中爲寧邑訓導崇尚正學日與諸生講究聖賢奧旨時稱良師同上

笄繼良萬歷中爲寧邑教諭廉潔自愛不受常儀與邑令相承燦倡明理學振興風教士民翕然蒸變同上

曾漢江西吉安人正德十五年任旌德教諭學問淹雅留心掌故輯旌川文獻錄行世同上

夏之鼎崑山人舉人萬厯四十二年任旌德教諭嚴督課藝
獎優絀劣諸生畏服文昌閣圯捐貲創修并建書院於閣傍

文風大振

同上

林文焯閩縣人正德間任太平教諭端謹溫良嫻習古禮率

諸生力行

同上

王佳士字希賢彭澤人舉人嘉靖中署太平教諭學問賅博
善講解嘗捐俸墊泮池改學朝向雅意作人

同上

國朝

張文衡字巨烜遼東人順治三年由青州同知擢撫寧兵備

時戎馬充斥蒞治方嚴自箴其前楹曰戒怒省刑禮遇耆舊

紳士摘治豪胥郡中股慄遷江南按察使

乾隆府志

秦宗堯字明宇遼東義州人順治九年由華州知州擢知寧國府性廉儉嘗質衣自給米薪蔬腐人皆得藉其數郡故貢黃連非土產也奏折直三之二順治十三年

詔許知府得言地方利病宗堯同巡按御史鍾有鳴交疏請改得全免府堂燬躬自引責營建不勞吏民賓興台校士宗堯集鄉大夫郡齋公閱一日夜竟莫敢干以私是歲首錄者鄉舉凡三人遷薊州道副使

同上

莊泰宏奉天人貢生康熙七年任寧國府知府政簡刑清卓有丰采纂修郡志修建郡學甲寅饒賊寇警民大恐泰宏偕參將劉九禮協力城守躬行鎮撫令民願畱者守否則聽出

嚴飭兵卒毫不恣擾市野安堵

同上

王國柱奉天人康熙十八年任寧國知府平易近人不事鞭朴遠邇安之在任日久訖無廢事解組別士民詩有曰出守宣州十六秋清風兩袖去孤舟蓋自道也去後民思之不置

同上

許廷試號可菴錢黃旗人廕生康熙四十年任寧國知府才猷敏決多所整理兩護布政使司印郡洊饑米價騰貴廷試檄領米穀平糶民甚德之後擢鎮江分巡道在任卒郡邑民赴弔哭者數百人

同上

佟賦偉字德覽號青士襄平人監生康熙四十八年任寧國

寧國府志

卷五

府知府郡頻稷賦偉實心經理閔雨所晴勸農講約置義塚
掩骼齒捐修新稔壩增築桑河石壩擴筴岳壩溉田十數萬
畝水利以溥又飭修南邑清弋江長堤修宜南學請改南邑
爲大學郡中諸名勝無不修舉建南樓祀先儒於正學書院
課多士資以膳田自號二樓居士時與士大夫讌集賦詩作
二樓志紀事諸書攝宣篆一載催科撫字兼施盡善艱去民
泣送載道不忍別

同上

宋敦長洲人由歲貢援例授知縣推陞同知乾隆十二年擢
任寧國府知府清慎勤敏所在多惠政士民德之蒞寧七年
修郡志興書院增文廟樂器修崇聖宮建講堂濬定陵溪捐

廉建李公橋修廢舉墜造士愛民罔遺餘力乾隆十八年涇
旌蛟發宜南諸邑埃田廬無數毀捐糜俸賑給活者不勝計
是年以老致仕嘉慶十一年崇祀名宦事實冊

楊應標號南城嘉興人進士順治十八年任寧國推官貞介
絕俗冲談寡營載米自給所需蔬水而已其接人如坐春風
一干以私冰雪立見省事防忠士民德之以艱去同上

胥琬號麓菴濰人進士康熙十四年知宣城明練多所興革
時魚課冊散失民苦橫斂琬鈎考得舊額詳核之刊布里戶
積弊以清十五年遷兵部督捕主事乾隆府志作戶部據題各碑改

翟蒙孔東莞人舉人知宣城性愷惻禮士愛民務以德化不

事鞭朴有兄弟訟者對之自責曰令不能導民禮讓致乖同
氣令之咎也兄弟感泣自悔宣故有螟患蒙孔齋宿禱於神

詣田間以文禳之忠遂息以憂去士民祀之

乾隆府志

杜源字巨公直隸大興人監生康熙中知南陵性慈祥有操
守屏絕苞苴八年如一日民訟者以情理戒諭之令自新各
愧服刁健以息卒官民哀之如失父母祠祀

同上

習全史鑲藍旗人順治壬辰進士知涇縣當更化之初加意
撫綏懲猾吏清淹繫斷獄平允擒平山賊建考坑關樓民賴
以安修預備倉修邑志多所整理以事鐫級去士民惜之

同上

劉鴻盤字蘇嵐韓城人順治乙酉解元知涇縣邑城西臨河

遇霖潦輒被衝壩鴻盤作護堤以捍水勢民無水患己亥海寇犯京口郡縣多有株連論罪者鴻盤被謫屢擢三木堅保官民無他當事覆驗得釋民懷其德刻木尸祝祀水西書院

上同

鄧琪棻字偉男全州人舉人康熙十三年知涇縣首請行條編法截去批頭名色戶無偏累民賴以蘇修水西書院集諸生肄業其中儒風丕振士民祀之於歸戶祠

同上

傅九鼎字禹山貴州人舉人康熙三十六年知涇邑多宿逋郡守於炎暑日親涖徵比九鼎念民凋敝涕泣匍匐請少緩會守以郡試還署諸生童皆就試而郡差迭下迫呼益迫鼎

歎曰吾何忍見黎民受嚴刑耶夜自經死民哀痛執喪生童
感其義歸共設位而哭閭邑如喪怙恃爭具賻以資喪事踰
年櫬歸老幼燃香哭送建祠祀之一在郡公館右一在縣城
隍廟右

同上

馬光宇幼實邵平人進士康熙十三年知寧邑素僻陋光下
車建尊經閣立西津書院以禮教民俗爲一變時徽浙兩界
伏莽跳梁練鄉勇嚴偵候訖不敢犯邑中有無賴子屢作不
靖光擒其渠魁置之法民以安堵嘗興水利較權量至今有
馬公塘市肆間以馬公斗爲準治邑六年以卓異薦擢御史

祠祀

江南通志

陳主策字世持靈寶人舉人康熙二十年知寧禁革糧里積弊行一條鞭法以便輸納折獄明允訟者心服雅意作人士

風丕振遷理藩院判祠祀

乾隆府志

李錦字繡章三韓人康熙二十二年知寧治清慎不事更

張宜俗化民以憂去民建去思亭祠祀

同上

陳養元字芷濱武陵人舉人康熙四十八年知寧持躬廉介

敷治精誠歲旱步禱立雨時疫施藥活民建橋築壩葺學校

修邑志百廢具舉士民傳頌不棄行取入都卒祠名宦

同上

李滋發河南人順治五年知旌德時刁民嘯聚山中劫掠幼

穉勒索回贖滋發計誘戮之以擅殺獲譴去士民惜焉

同上

周一熊號章巒鍾祥人進士順治九年知旌德學富才敏深
悉里甲之弊力滌豪胥侵欺均里便民著爲例捐修文廟培
植士民以暴疾卒人哀之同上

王融號自純安邑人副榜順治十二年知旌德修文廟文昌
閣又捐修城闔迎和義濟二門纂修邑乘皆有成績同上

夏文炳號麟園定番人舉人康熙三十八年知旌德慈惠愛
民真誠待士聽訟勸民和息不事刑威邑修學宮廣以署地
爲今聖殿文風以振同上

鹿兆圖號祥璵福山人貢士順治三年知太平時常新造加
意撫循舊例南北二糧及諸雜稅俱僉民解弊費孔多兆圖

與邑紳程言李一元協議詳改由官徵解民得休息

同上

傅大業字用滋南豐人進士康熙八年知太平值歲旱大業捐米五百石爲倡縣丞張若械亦捐米若干石又親詣各大姓委曲勸諭設廠煮粥編民立竿以次給發萬無一遺亦無譁者自辛亥夏至壬子春闕期年如一日張丞亦與有力焉大盜某妄攀鄰家未字女爲媳應坐罪大業屢折其誣盜辭卒不易憲檄嚴駁業不動竟釋之遂以此忤臺司去官

同上

王鄰字欽四曲周人康熙十六年進士知太平時禁革里排他邑以錢賦奇零夫馬紛錯或仍問之里排鄰獨禁革如例聽訟則令原告持牒喚被訴之人至庭片言決遣五載不遺

一役至民家絕苞苴杜請謁以卓異遷部曹

江南通志

宗泰號方平靈山衛人貢士康熙十一年簿宣城好施濟代

民完逋倡育嬰會力禁溺女置義田於學宮遷經歷

乾隆府志

夏世德順天人康熙八年以監生任太平典史廉敏有聲歲

稔奸徒糾黨劫掠鄉村世德請於當事親詣捕獲薄懲從犯

斃渠魁數人於杖下地方以靖

同上

史鑑宗字遠公金壇人舉人順治十七年任南陵教諭以尊

經閣圯捐金建之月集多士爲七藝課雅意作人尤精藻鑑

決科名無一爽者以艱歸

同上

施化遠字元引上元人舉人順治中署涇教諭時邑經兵燹

絃誦希聞化遠力募新文廟月進諸生講經課業文學漸振

又周婁士急遷知容城卒官貧甚涇士祀之書院

同上

吳邦俊江都人貢生順治二年任旌德教諭時學宮燬於兵

燹邦俊倡捐銀二百五十金創建訓誨多士稱盡職焉

同上

毛文策宜興人舉人順治十年任旌德教諭績學能文以振興學校爲已任督課士子董率有方捐修文廟贊修邑志均

有力焉

同上

劉完人贛榆人順治十二年任旌德訓導勤課士子整飭學

校捐俸修文昌閣與修縣志皆著勞績

同上

張孝揚號存齋吳縣人舉人康熙三十八年任旌德教諭月

課士子闡明經史綽有古風與邑令夏文炳倡修學宮廣以

署地時稱秉鐸得人

同上

劉九禮陝西人康熙十年任寧國營參將軍令嚴明約束士卒無得擾害有一卒暴取民薪立縛而置之法甲寅饒賊掠近境郡邑震動九禮防禦有方一以靜鎮民恃無恐擢京口副將百姓遮道拜送馬不得前

同上

按乾隆志附記周超獨孤霖崔羣田錫劉廷璘華璉羅觀陳邦宜八人查周超已入名宦其餘七人俱於表中載明茲不贅及以從闕文之義又乾隆志載涇令陳焦興水利布善政卒官按吳志永安四年安吳民陳焦死埋之六日

更生穿土出太平廣記引五行志同是焦民也非令也涇
縣舊志有焦死七日化爲小兒坐墓上久乃不見之說似
涉誕妄故職官表存其名而名宦傳刪之